

ANG DALAN PAKADTO SA DIOS





© 2010, World Missionary Press, Inc. Selected scriptures taken from The Hiligaynon Bible (Ang Pulong Sang Dios) Copyright © 1996 by Biblica, Inc.®. Used by Permission of Biblica, Inc. ® All rights reserved worldwide.

GINTUGA SANG DIOS ANG KALIBUTAN 1

KAG ANG TANAN NGA BUHI NGA TINUGA

“Sang ginsuguran gintuga sang Dios ang kalangitan kag ang kalibutan.” –Genesis 1:1

“Paagi [kay Cristo]... ginhimo sang Dios ang tanan nga mga butang sa langit kag sa duta.” –Colosas 1:16a

“Kabay pa nga pakamaayuhon kamo sang GINOO nga nagtuga sang kalangitan kag sang kalibutan. Ang kalangitan iya lang sang GINOO, pero ang kalibutan gintugyan niya sa mga tawo.” –Salmo 115:15,16

Perpekto ang kalibutan sang gintugyan ini sang Dios sa tawo. Basaha ang ini nga balasahon agod mahibaluan mo kon ano ang natabo sa kalibutan.

2 GINHIMO SANG DIOS ANG TAWO



“Dayon nagsiling ang Dios, ‘Mahimo kita sang tawo nga kaanggid sa aton. Magagahom sila sa tanan nga klase sang mga sapat . . .’ Gani gintuga sang Dios ang tawo, lalaki kag babayi, nga kaanggid sa iya.”

—Genesis 1:26a, 27

ANG TAWO NANGIN BUHI NGA TINUGA 3

“Ginhimo sang GINOONG Dios ang tawo halin sa duta. Ginhuypan niya sa ilong ang tawo sing ginhawa nga nagahatag sang kabuhi. Gani ang tawo nangin buhi nga tinuga.”
—Genesis 2:7

“Dayon nagsiling ang GINOONG Dios, ‘Indi maayo nga ang tawo nagakabuhi nga nagaisahanon lang, gani himuan ko siya sing kaupod nga magabulig sa iya kag bagay sa iya.’ Gani ginpatulog sang GINOONG Dios ang tawo sing mahamuok gid. Kag samtang nagakatulog siya, ginkuha sang GINOONG Dios ang isa niya ka gusok kag ginkipot dayon ang ginkuhaan sini. Ang gusok nga ginkuha sang GINOONG Dios sa lalaki ginhimo niya nga babayi, kag gindala niya siya sa lalaki.”
—Genesis 2:18, 21, 22

4

WALA NAGTUMAN SA DIOS SI ADAN KAG SI EVA



Indi gid kita magpamati sa mga ginahambal ni Satanas.

**“Ginpaestar sang GINOONG Dios sa katamnan sang 5
Eden ang tawo nga iya ginhimo agod mag-atipan sini.
Kag ginsilingan niya siya, ‘Makakaon ka sang bunga sang
bisan ano nga kahoy sa katamnan, luwas lang sang bunga
sang kahoy nga nagahatag sang ihibalo kon ano ang maayo
kag ang malain. Kay sa tion nga kaunon mo ini, sigurado
gid nga mapatay ka.’”** –Genesis 2:15-17

**GINKONTRA SANG MAN-OG NGA SI SATANAS ANG GIN-
HAMBAL SANG DIOS, KAG NAGBUTIG SIYA.**

**“Nagsiling ang man-og sa babayi, ‘Indi matuod nga ma-
patay kamo!’ Sang makita sang babayi nga ang kahoy
manami tulukon kag ang iya bunga manamit kaunon, kag
tungod nga naghandom siya nga mangin maalam, nagkuha
siya sang bunga kag iya ini ginkaon. Ginhatagan man niya
ang iya bana kag nagkaon man siya.”** –Genesis 3:4, 6

6 GINPAHALIN SI ADAN KAG SI EVA SA KATAMNAN SANG EDEN



“Gani ginpahalin sang GINOONG Dios ang tawo sa katamnan sang Eden sa pagpanguma sang duta nga amo ang iya ginhalinan... Nagbutang ang GINOONG Dios sang mga kerubin sa sidlangan dampi sang katamnan sang Eden. Kag nagbutang man siya sang espada nga nagadabadaba kag nagatiyog agod wala sing may makapalapit sa kahoy nga nagahatag sang kabuhi.”

—Genesis 3:23, 24b

**ISA KA MASUBO NGA BUTANG PARA SA MGA 7
TAWO SA KALIBUTAN ANG GINHIMO NI ADAN
KAG NI EVA**



“Ang sala nagsulod sa kalibutan tungod sang paglapas ni Adan sa sugo sang Dios, kag ang iya sala nagdala sang kamatayon. Gani nag-abot ang kamatayon sa tanan nga mga tawo.”

—Roma 5:12a

Ang tagsa ka tawo natawo nga may makasasala nga kinaugali kag mapatay sa ulihi kay ang kamatayon nag-abot tungod sa sala.

8 GINPADALA SANG DIOS ANG IYA BUGTONG NGA ANAK SA PAGLUWAS SA TAWO SA SALA



Kinahanglan sang Anak sang Dios nga magpakatawo agod mangin bahin siya sang mga tawo sa kalibutan.

“Magabata [si Maria] sing lalaki kag ngalan mo [ang bata] nga Jesus, kay luwason niya ang iya katawhan sa ila mga sala.”

–Mateo 1:21

“Ang matuod, si Cristo nangin tawo, kag bisan nangin tawo siya, yara pa gihapon sa iya ang iya pagka-Dios.”

–Colosas 2:9

SI JESUS DIOS NGA NAGPAKATAWO 9

“Sang una pa nga daan, yara na ang ginatawag nga Pulong. Ang Pulong kaupod na sang Dios, kag ang Pulong amo mismo ang Dios. Ang ginatawag nga Pulong nagpakatawo kag nagpakig-upod diri sa aton.” —Juan 1:1, 14a

“Natabo ini agod matuman ang ginsiling sang Ginoo paagi sa propeta nga nagsiling, ‘Magabusong ang isa ka ulay, kag magabata siya sing lalaki. Kag ang ini nga bata pagatawgon nga Emmanuel’ (nga kon sayuron, ‘Ang Dios kaupod naton’).” —Mateo 1:22, 23

“Matawo ang isa ka bata nga lalaki kag magahari siya sa amon. Pagatawgon siya, ‘Makatilingala nga Manuglaygay, Makagagahom nga Dios, Wala sing Katapusan nga Amay, kag Pangulo nga Nagapaluntad sang Kalinong!’ ” —Isaias 9:6

10 SI JESU-CRISTO AMO ANG PERPEKTO NGA HALAD SA DIOS

“Si Cristo wala gid sing sala.” –2 Corinto 5:21a

“Wala gid [si Cristo] nakasala, kag wala gid nagbutig.”

–1 Pedro 2:22

Wala sing halad nga sarang mahalad sang tawo sa Dios nga tuman nga makakuha sang sala.

“Ang dugo sang mga turo nga baka kag sang mga kanding nga ila ginahalad indi gid makakuha sang ila mga sala.” –Hebreo 10:4b

Si Jesus kaangay sang sapat nga halad sa Dios. “Yari na ang Karnero sang Dios nga inughalad agod magkuha sang sala sang mga tawo sa kalibutan.”

–Juan 1:29b



GINHATAG NI JESUS ANG IYA KABUHI PARA MALUWAS KITA

11

Ginlansang si Jesus sa kahoy nga krus tungod akig sa iya ang malaot nga mga tawo. Pero ang iya kamatayon suno sa plano sang Dios. Kinabubut-on nga gintugyan ni Jesus ang iya kabuhi agod maluwas ikaw kag ako sa aton mga sala.

Nagsiling si Jesus, **“Wala sing may makapatay sa akon kon indi ko ini pag-itugot. Pero kabubut-on ko nga ginahatag ang akon kabuhi. Pagusto ako sa paghatag sini, kag pagusto man ako sa pagbawi sini.”**

—Juan 10:18a

GINTUBOS KITA PAAGI SA DUGO NI JESUS NGA AMO ANG KARNERO SANG DIOS

“Ang gintubos sa inyo indi mga butang nga madula, pareho sang bulawan ukon pilak, kundi amo ang hamili nga dugo ni Cristo. Ang iya halimbawa pareho sang karnero nga matinlo kag wala gid deperensya nga ginhalad sa Dios.” —1 Pedro 1:18b,19

Wala na sing iban pa nga halad nga makakuha sang sala.

12 “Tungod nga karon ginpakamatarong na kita sang Dios paagi sa dugo ni Cristo, makasiguro gid kita nga tungod kay Cristo makalikaw kita sa silot sang Dios nga magaabot.”

“Jesus, dumduma man ako kon maghari ka na!” –Lucas 23:42b

–Roma 5:9

Ini nga kawatan nagtuo kay Jesus kag naluwas siya.



“Matuod ining ginasiling ko sa imo nga karon nga adlaw mangin kaupod ko ikaw sa Paraiso.”
–Lucas 23:43b



Ini nga kawatan wala nagtuo kay Jesus, gani wala siya naluwas.

“Nagpanginmatay [si Cristo] para sa aton bisan sang mga makasasala pa kita.”
–Roma 5:8a

**ANG TANAN NGA NAGATUO SA ANAK SANG 13
DIOS MAKAANGKON SANG KABUHI NGA WALA
SING KATAPUSAN**

**“Ginahigugma gid sang Dios ang kalibutan, amo gani
nga ginhatag niya ang iya bugtong nga
Anak, agod nga ang bisan sin-o nga magtuo
sa iya indi mawala kundi hatagan sang
kabuhi nga wala sing katapusan.”**

–Juan 3:16

**“Ginluwas kita [sang Dios] halin sa gahom sang kadudul-
man kag ginsaylo niya kita sa ginharian sang iya hinigugma
nga Anak. Paagi sa iya Anak gintubos niya kita, nga ang
buot silingon, ginpatawad na niya ang aton mga sala.”**

–Colosas 1:13, 14

NABANHAW SI JESUS

“Nagsiling ang anghel sa mga babayi, ‘Indi kamo magkahadlok. Nahibaluan ko kon ngaa nagkadto kamo diri. Ginapangita ninyo si Jesus nga ginlansang sa krus. Wala siya diri tungod kay nabanhaw siya subong sang iya ginsiling sa inyo. Dali kamo diri, tan-awa ninyo ang ginhamyangan sa iya.’” —Mateo 28:5, 6

SI JESUS BUHI SA GIHAPON

15

“May kabuhi ako nga wala sing katapusan. Napatay ako, pero tan-awa, buhi ako, kag indi na gid mapatay. May gahom ako sa kamatayon kag sa lugar sang mga patay.” –Bugna 1:18

“Tungod kay ako nagakabuhi, kamo magakabuhi man.”

–Juan 14:19b

Nadaog na ni Jesus ang gahom sang kamatayon, gani indi kita dapat mahadlok sa kamatayon.

“Kon nahadlok ako, magasalig ako sa imo, O Dios.”

–Salmo 56:3

MAKALUWAS SI JESUS SA IMO KAG NAGAPANGAMUYO SIYA PARA SA IMO

“Si Jesus wala sing kamatayon, gani sarang niya maluwas sa bisan ano nga oras ang bisan sin-o nga tawo nga magpalapit sa Dios paagi sa iya. Kay buhi siya sa wala sing katapusan sa pag-pakitluoy sa Dios para sa ila.” –Hebreo 7:24a, 25

IKAW KAG AKO MAKAANGKON SANG KABUHI NGA WALA SING KATAPUSAN



Ano nga dalan ang imo ginaagyan?

Si Jesu-Cristo amo ang dalan pakadto sa kabuhi nga wala sing katapusan.

Si Satanas amo ang dalan pakadto sa kamatayon nga wala sing katapusan.

Ginpili sang sini nga bata ang husto nga dalan pakadto sa kabuhi nga wala sing katapusan.

“...Magpili kamo karon nga adlaw kon sin-o ang inyo alagaron” –Josue 24:15

“Pilia ninyo ang kabuhi agod nga kamo kag ang inyo mga kaliwat magakabuhi.” –Deuteronomio 30:19b

SI JESUS ANG DALAN PAKADTO SA KABUHI NGA WALA SING KATAPUSAN

“Wala na sing iban sa bug-os nga kalibutan nga makaluwas sa aton kundi si Jesus lang.” –Binuhatan 4:12

“Ako gid lang ang Ginoo kag luwas sa akon wala na sing iban pa nga Manluluwas.” –Isaias 43:11

18 NGAA SI JESUS ANG ATON PILION KON GUSTO TA NGA MAANGKON ANG KABUHI NGA WALA SING KATAPUSAN?

1. *Nagkari siya sa paghatag sang kabuhi nga wala sing katapusan.*



“Nagkadto [ako] diri sa kalibutan agod mahatagan ko ang mga tawo sing kabuhi, kag ini wala gid sing kulang.”

—Juan 10:10b

2. *Ginahigugma niya kita kag nag-panginmatay siya para sa aton.*

“[Ang] Anak sang Dios... naghigugma sa akon kag naghalad sang iya kabuhi para sa akon.”

—Galacia 2:20b

**“Si Jesus mismo nagpakatawo man agod iha- 19
lad niya ang iya kaugalingon para sa ila, kay
paagi sa iya kamatayon mapierde niya si Satanas
nga amo ang ginahalinan sang kamatayon sang
mga tawo.”** –Hebreo 2:14b

***3. Paagi lang sa dugo ni Jesus mapatawad ang
aton mga sala.***

**“Ang dugo nga amo ang nagahatag sang kabuhi,
amo ang makatubos sa tawo sa iya mga sala.”**
–Leviticus 17:11b

**“Ang dugo ni Jesus nga Anak sang Dios nagatinlo
sa aton sa tanan ta nga mga sala.”** –1 Juan 1:7b



**4. Nabanhaw siya sa kamatayon
kag nagakabuhi karon hasta
sa wala sing katapusan.**

**“Nakahibalo kita nga tungod si
Cristo nabanhaw, indi na mahimo
nga mapatay siya liwat. Wala na
sing gahom ang kamatayon sa
iya.”**

—Roma 6:9

**“Napatay siya para sa tanan, agod nga ang mga tawo
nga buhi karon indi na magkabuhi para sa ila kaugali-
ngon kundi para sa iya nga napatay kag nabanhaw para
sa ila.”**

—2 Corinto 5:15

**Nagsiling si Jesus, “Tungod kay ako nagakabuhi, kamo
magakabuhi man.”**

—Juan 14:19b

**5. *Kinahanglan naton ang Espiritu ni Cristo* 21
*agod maangkon naton ang kabuhi nga wala
sing katapusan.***

“Tungod nga si Cristo yara na sa inyo, may paglaom kamo nga mangin matahom gid ang inyo kahimtangan sa palaabuton.” –Colosas 1:27b

“Karon, tungod nga ang Espiritu sang Dios nga nagbanhaw kay Jesus nagakabuhi sa inyo, siya nga nagbanhaw kay Cristo amo man ang magahatag sang kabuhi sa inyo mga lawas nga may kamatayon. Kag himuon niya ini paagi sa iya Espiritu nga nagapuyo sa inyo.” –Roma 8:11

SIGURADUHA NGA ANG ESPIRITU NI CRISTO YARA SA IMO

“Ang tawo nga wala sa iya ang Espiritu ni Cristo indi iya ni Cristo.” –Roma 8:9b

**22 BISAN ANG MGA KABATAAN GUSTO
SANG DIOS NGA MAKANGKON
SANG KABUHI NGA WALA SING KATAPUSAN**



“Ginahigugma ni Jesus ang tanan nga kabataan.”

**“Gintawag ni Jesus ang mga bata nga magpa- 23
lapit sa iya, kag nagsiling siya sa iya mga
sumulunod, ‘Pabay-i lang ninyo ang mga bata nga
magpalapit sa akon. Indi ninyo sila pagpunggi, kay
ang mga pareho sa ila nasakop sa paghari sang
Dios.’ ”**

–Lucas 18:16

**“Indi gid luyag [sang inyo Amay sa langit] nga madula
ang bisan isa lang ka gamay nga bata.”**

–Mateo 18:14b

Ini nga mga bersikulo nagapamatuod nga bisan ang mga bata palangga sang Dios, kag dapat tudluan sila sang husto. Indi kita maghimo sang malain nga mangin kabangdanan nga magpalayo sila sa Dios.

24 PAANO MO MAANGKON ANG KABUHI NGA WALA SING KATAPUSAN

1. *Akuon mo nga ikaw isa ka makasasala.*

“Ang tanan nga mga tawo nagpakasala kag indi takos sa panulok sang Dios.” –Roma 3:23

2. *Magpalapit ka sa Dios paagi sa pagtuo kay Jesu-Cristo.*

“May isa lang ka manugpatunga sa Dios kag sa mga tawo. Ini wala sang iban kundi ang tawo nga si Cristo Jesus.”
–1 Timoteo 2:5b

“Sarang maluwas [ni Jesus] sa bisan ano nga oras ang bisan sin-o nga tawo nga magpalapit sa Dios paagi sa iya.”
–Hebreo 7:25a

Nagsiling si Jesus, **“Ang mga nagapalapit sa akon indi ko gid pagsikwayon.”**
–Juan 6:37b


3. Ituad ang imo mga sala kay Jesus kag hinulsuli ini.

“Kinahanglan maghinulsol na kamo kag magpalapit sa Dios, agod patawaron niya ang inyo mga sala.”

–Binuhatan 3:19b

“Wala nagapatumbaya [ang Dios] kundi nagahulat siya nga maghinulsol ang mga tawo sa ila mga sala, tungod kay indi niya luyag nga may mawala.”

–2 Pedro 3:9b




26 Isulat sa mga linya ang promisa sang Dios kon magtuad ka sang imo mga sala sa iya suno sa ginbasa mo sa 1 Juan 1:9 sa pahina 25.

4. *Talikdi ang imo mga sala.*

“Indi ka gid magmauswagon kon indi mo pag-ituad ang imo mga sala, pero kon ituad mo ini kag talikdan, kaluoyan ka sang Dios.” –Hulubaton 28:13

“Likawi ang malain kag himua ang maayo.”
–Salmo 37:27a



“Tungod sa bugay sang Dios naluwas kamo paagi sa inyo pagtuo kay Jesu-Cristo. Ini regalo sang Dios kag wala nabasi sa inyo maayo nga mga binuhatan, gani wala gid sing may makapabugal.” –Efeso 2:8, 9

5. *Magtuo ka kay Jesu-Cristo.*

27

“Kon isugid mo nga si Jesus amo ang Ginoo kag nagatuo ka sa imo tagipusuon nga ginbanhaw siya sang Dios halin sa kamatayon, maluwas ka.”

–Roma 10:9

“Magtuo ka kay Ginoong Jesus kag maluwas ka kag ang imo panimalay.”

–Binuhatan 16:31b

28 6. *Batuna si Jesu-Cristo sa imo kabuhi.*

Buksi ang imo tagipusuon kag pasudla si Jesus. Nagsiling si Jesus, “**Nagatindog ako sa puwertahan kag nagapanuktok. Kon may makabati sang akon panawag kag padayunon niya ako sa iya balay, madayon ako, kag magaupod kami kaon.**”



—Bugna 3:20

“**Ang bisan sin-o nga nagbaton kag nagtuo sa iya ginhatagan niya sing kinamatarong nga mangin anak sang Dios.**”

—Juan 1:12

ISA KA PAMAAGI SA PAGPANGAMUYO 29

Kon wala pa ikaw makaagi pangamuyo kag gusto mo nga mabuligan sa pagpangamuyo, puwede mo nga sundon ini nga pangamuyo:



Ginoong Jesus,

Salamat sa imo pagpanginmatay sa krus sa pagkuha sang akon mga sala. Patawara ako sa tanan nga malain nga ginhimo ko. Ginapangabay ko ikaw nga magsulod sa akon tagipusuon kag magpuyo diri hasta san-o. Nagasalig ako nga gintinluan mo ang akon tagipusuon. Ginabaton ko ikaw nga akon Agalon kag Manluluwas.

Amen.

30 KON ARA SI JESUS SA IMO TAGIPUSUON, MAANGKON MO ANG KABUHI NGA WALA SING KATAPUSAN

“Amo ini ang ginapamatuod sang Dios: nga kita ginhatagan niya sang kabuhi nga wala sing katapusan, kag ining kabuhi yara sa iya Anak. Ang bisan sin-o nga yara sa iya ang Anak may kabuhi nga wala sing katapusan.” –1 Juan 5:11,12b

Nagsiling si Jesus, “Sa pagkamatuod, ginasugid ko sa inyo nga ang tawo nga nagatuman sang akon mga pulong kag nagatuo sa nagpadala sa akon may kabuhi nga wala sing katapusan.”
–Juan 5:24a

Kon ang isa ka tumuluo mapatay, bayaan niya ang iya lawas sa duta kag magpauli siya sa Ginoo (2 Corinto 5:8).

Kon ginpangabay mo si Jesus nga patawaron niya ang imo sala, kag nagtuo ka sa iya nga siya amo ang imo Manluluwas, isulat ang imo ngalan sa idalom:

PAANO MO SUNDON SI JESUS PERMI 31



Basaha ang Biblia kada adlaw kag tipigi ini sa imo tagipusuon paagi sa pagsaulo sang pila ka mga bersikulo nga makabulig sa imo. (Madamo sa sini nga balasahon ang puwede mo sauluhon.)

“Ang bug-os nga Kasulatan gin-sulat paagi sa gahom sang Dios, kag mapuslanon sa pagtudlo sang kamatuoran, sa pagsabdong sang sala, sa pagtadlong sang sayop, kag sa pagtudlo sang matarong nga pagkabuhi, agod nga ang tawo nga nagaalagad sa Dios matudluan sa paghimo sang tanan nga klase sang kaayuhan.” –2 Timoteo 3:16

32 MAGPAKIGSUGILANON PERMI KAY JESUS PAAGI SA PANGAMUYO

Pasalamat siya sa tanan nga maayo nga mga butang nga nabaton mo sa imo nga kabuhi. Dayawa siya sa mga butang nga ginhimo niya sa imo kag sa pagluwas niya sa imo. Magpangamuyo ka sa imo mga kinahanglanon. Himua ini sa ngalan ni Jesus.



“Pamatian niya ang bisan ano nga aton pangayuon suno sa iya kabubut-on.”

–1 Juan 5:14b

“Magpangamuyuyay agod mag-ayo kamo. Kay dako ang mahimo sang pangamuyo sang matarong nga tawo.” –Santiago 5:16b

“Bisan pa ang mga nagahingabot sa inyo pangamuyuan ninyo.” –Mateo 5:44b

**ANG PANGAMUYO NGA GINTUDLO NI JESUS 33
SA IYA MGA SUMULUNOD**

“Amay namon nga yara sa langit, kabay pa nga tahuron ikaw sang mga tawo. Kabay pa nga maghari ka diri sa amon. Kag subong nga ang imo kabubuton ginatuman dira sa langit, kabay pa nga tumanon man diri sa kalibutan. Hatagi kami sang amon kinahanglanon nga pagkaon sa sini nga adlaw. Patawara kami sang amon mga sala, kay ginapatawad man namon ang nakasala sa amon. Indi mo kami pagipadaog sa mga pagsulay, kundi luwasa kami kay Satanas. Tungod nga ikaw ang Hari, ang Makagagahom, kag ang Dalayawon sa wala sing katapusan. Amen.”

—Mateo 6:9-13

**34 ANG NAPULO KA MGA SUGO SANG
 DIOS NAGATUDLO SA ATON KON
 PAANO KITA MAGKABUHI**

(Exodo 20)

Ang nahauna nga apat ka sugo parte sa aton paghigugma sa Dios:

1. Dapat wala na kamo sang iban pa nga Dios magluwas sa akon.

2. Indi kamo maghimo sang mga dios-dios sa dagway sang mga butang sa langit, sa duta, kag sa tubig...Indi ninyo ini pagsimbahon ukon pag-alagaron.

3. Indi ninyo paggamiton sa wala sing pulos ang ngalan sang Ginoo nga inyo Dios.

4. Dumduma ninyo ang Adlaw nga Inugpahuway paagi sa pagpakabalaan sini.

Ang katapusan nga anom ka sugo parte sa aton paghigugma sa aton isigkatawo:

35

- 5. Tahura ninyo ang inyo amay kag iloy.**
- 6. Indi kamo magpatay.**
- 7. Indi kamo magpanginbabayi ukon magpanginlalaki.**
- 8. Indi kamo magpangawat.**
- 9. Indi kamo magsaksi sing binutig sa inyo isigkatawo.**
- 10. Indi kamo magkaibog . . . sa bisan ano nga butang sang inyo isigkatawo.**

**GINASABAT SANG DIOS ANG ATON MGA PANGAMUYO
KON GINATUMAN NATON ANG IYA MGA SUGO**

“Bisan ano ang aton pangayuon sa iya mabaton ta, kay ginatuman ta ang iya mga sugo kag ginahimo ang iya luyag.”

–1 Juan 3:22

ANG GUGMA AMO GID ANG LABING IMPORTANTE

37

(I Corinto 13:1-8, 13)

¹Bisan makahambal ako sang nagkalain-lain nga mga linguahe sang mga tawo kag sang mga anghel, pero kon wala ako sing gugma sa akon isigkatawo, daw pareho lang ako sa agong nga magahod ukon lingganay nga matagsing.

²Kag bisan makasugid ako sang pulong sang Dios kag makahibalo sang tanan nga tinago nga mga kamatuoran pati ang nagkalain-lain nga mga kaalam, kag bisan mapasaylo ko ang bukid tungod sang akon dako nga pagtuo, kon wala ako sing gugma wala gid ako sing pulos.

³Bisan ipanagtag ko sa mga imol ang tanan ko nga mga pagkabutang, kag bisan ihalad ko ang akon lawas nga sunugon, kon wala ako sing gugma wala ako gihapon sing

38 pulos. ⁴Ang tawo nga nagahigugma mapinasensyahon, maayo sa iya isigkatawo, indi mahisaon, indi hambog ukon bugalon, ⁵indi bastos, indi maiyaiyahon, indi maakigon, indi madumot, ⁶wala nalipay sa malaot kundi sa matarong, ⁷permi mainantuson, permi may pagsalig kag paglaom, kag permi mabinatason. ⁸May katapusan ang mga pagsugid sang pulong sang Dios kag ang mga paghambal sa iban nga mga linguahe nga wala natun-i, pati ang mga pagsaysay sang kaalam sang Dios, pero ang gugma wala gid sing katapusan. ¹³Tatlo ka butang ang nagapadayon, kag ang tatlo nga ini amo ang pagsalig, paglaom, kag ang gugma. Pero ang gugma amo gid ang labing importante.

ANG DIOS GUGMA

“Ang Dios gugma. Kag ang nagakabuhi nga may paghi-gugma, yara sa Dios, kag ang Dios yara sa iya.” –1 Juan 4:16b

GUSTO NI JESUS NGA MAGPANUGID 39 KA SA IBAN PARTE SA IMO PAGTUO



(sa imo balay, sa eskuwelahan,
sa simbahan, sa bisan diin)

Nagsiling si Jesus, “**Mag-
pauli ka sa imo pamilya kag
sugiran mo sila kon ano ang
ginhimo sang Ginoo sa imo
kag kon paano siya naluoy
sa imo anay kahimtangan.**”

—Marcos 5:19b

40 PAANO MAHIBALUAN KON ANG ISA KA TAWO MATUOD NGA ANAK SANG DIOS

“Makilala ninyo sila paagi sa ila mga buhat.” –Mateo 7:16

“Yari ang makita sa pagkabuhi sang tawo kon ang Espiritu Santo amo ang nagagahom sa iya: mahigugmaon siya, mali-payon, malinong ang iya pagkabuhi, mainantuson, malulo, maalwan, masaligan, mabuot kag makapugong sang iya kaugalingon.” –Galacia 5:22, 23a

“Kon ginapatawad ninyo ang mga tawo nga nakasala sa inyo, patawaron man kamo sang inyo Amay nga sa langit.” –Mateo 6:14

ANG PITO KA KLASE SANG TAWO NGA GINAKAUGTAN SANG DIOS

“Ang mga bugalon, ang mga butigon, ang mga nagapamatay sang tawo, ang mga nagaplano sing malain, ang mga maabtik maghimo sing malain, ang mga nagasaksi sing butig, kag ang mga nagapaaway sang iya kapareho.” –Hulubaton 6:17-19

ANG MGA BULUHATON SANG TAWHANON NGA KINAUGALI: 41


“Nagapakighilawas sila, mahigko kag malaot ang ila mga ginahimo. Nagasimba sila sa mga dios-dios, mga babaylan, nagakontrahanay, nagailinaway, maimon, maakigon, dalok, nagabinahin-bahin kag nagagrupo-grupo, nagahisaay, palahubog, maluyagon sa mga kalibutanon nga kasadyahan, kag kon ano pa ang ila mga ginahimo nga mahigko...ang mga tawo nga nagahimo sining mga butang indi makapanubli sang ginharian sang Dios.”
–Galacia 5:19b-21

“Ang mga lalaki nga nagabaligya sang ila dungog, ang mga lalaki nga nagauluasawa sa pareho nila nga lalaki, ang mga kawatan... kag ang mga tulisan.”
–1Corinto 6:9b, 10

TUGUTI NGA PUN-AN KA NI JESUS SANG IYA ESPIRITU KAG TINLUAN KA NIYA

“Pero... ginpain na kamo sang Dios nga mangin iya, kag ginpakamatarong na kamo tungod kay Ginoong Jesu-Cristo kag tungod sa Espiritu sang aton Dios.”
–1 Corinto 6:11b

42 ANG IMPYERNO ISA KA MATUOD NGA LUGAR



(Basaha ang Lucas 16:19-26.)

Siguraduha nga nagasalig ka kay Jesu-Cristo. Ibutang niya ang imo ngalan sa libro nga ginalistahan sang mga may kabuhi nga wala sing katapusan.

“Ang bisan sin-o nga ang iya ngalan wala sa libro nga ginlistahan sang mga may kabuhi nga wala sing katapusan ginhaboy sa linaw nga kalayo.”

—Bugna 20:15a

SI JESUS AMO LANG ANG DALAN PAKADTO SA 43 DIOS NGA AMAY

**“Amo ini ang ginapamatuod sang Dios: nga kita ginhata-
gan niya sang kabuhi nga wala sing katapusan, kag ining
kabuhi yara sa iya Anak.”** —1 Juan 5:11

**“Ang bayad sang sala amo ang kamatayon, pero ang
kabuhi nga wala sing katapusan amo ang regalo sang Dios
sa mga yara kay Cristo Jesus nga aton Ginoo.”** —Roma 6:23

**“Ang bisan sin-o nga nagatuo sa Anak sang Dios may
kabuhi nga wala sing katapusan. Pero ang bisan sin-o nga
indi magtuman sa Anak sang Dios indi gid paghatagan
sang kabuhi nga wala sing katapusan, kundi ang kaakig
sang Dios magapabilin sa iya.”** —Juan 3:36

**“Nagsabat si Jesus sa iya, ‘Ako amo ang dalan, ang
kamatuoran, kag ang kabuhi. Wala sing may makakadto sa
Amay kon indi paagi sa akon.’”** —Juan 14:6

44 ANG LANGIT ISA KA MATUOD NGA LUGAR



Nakita ni Juan sa iya palanan-awon ang bag-o nga langit kag bag-o nga duta.

“ ‘Pahiran [sang Dios] ang ila mga luha. Wala na sing kamatayon, kasubo, paghibi ukon kasakit tungod kay ang daan nga mga butang nakaligad na.’ Dayon nagsiling ang nagapungko sa trono, ‘Karon, ginabag-o ko na ang tanan nga mga butang!’ ”

—Bugna 21:4, 5a

Nakita man ni Juan ang Balaan nga Siyudad, ang bag-o nga Jerusalem, nga ginapaidalom sang Dios halin sa langit.

“Ang siyudad mismo puro bulawan kag matin-aw nga daw sa kristal. Ang mga bato nga pundasyon sang pader nadekorahan sang tanan nga klase sang malahalon nga mga bato.”

—Bugna 21:18b, 19a

**NAGBALIK SI JESUS SA LANGIT SA PAGPREPARAR 45
SANG PULUY-AN DIDTO PARA SA MGA
NAGATUO SA IYA**

“Indi kamo magsagi palibog. Magsalig kamo sa Dios kag magsalig man kamo sa akon. Didto sa balay sang akon Amay may madamo nga mga kuwarto. Magauna ako didto para magpreparar sang lugar para sa inyo. Indi ako magsiling sini sa inyo kon indi ini matuod. Kon didto na ako kag nakapreparar na sang lugar para sa inyo, mabalik ako agod kuhaon ko kamo, agod nga kon diin ako didto man kamo.”

–Juan 14:1-3

ISUGID INI NGA MAAYONG BALITA SA IBAN

Nagsiling si Jesus, “Lakat kamo sa bug-os nga kalibutan kag iwali ang Maayong Balita sa tanan nga mga tawo.”

–Marcos 16:15b

ANG MGA PROMISA SANG DIOS SA IYA MGA ANAK

“Indi ko gid kamo pagbayaan, kag indi ko gid kamo pagpabay-an.”
—Hebreo 13:5b

“Suguon sang Dios ang iya mga anghel sa pagbantay sa imo bisan diin ka makadto.” —Salmo 91:11

“Dumdumon ninyo nga kaupod ninyo ako permi hasta sa katapusan sang kalibutan.”

—Mateo 28:20b

“Indi kamo magkahadlok sa mga butang nga madali na lang ninyo pagaantuson... magpakatutom kamo bisan nagakahulugan ini sang inyo kamatayon, kag hatagan ko kamo sang kabuhi nga wala sing katapusan bilang padya.”
—Bugna 2:10

“Magpanawag ka sa akon, kag sabton ko ikaw.” —Jeremias 33:3a



Pagabanhawon ang tanan nga patay.

“Magaabot ang tion nga ang tanan nga mga patay makabati sang akon pulong, kag magaguwa sila sa ila lulubngan. Ang mga tawo nga naghimo sing maayo banhawon kag hatagan sang kabuhi nga wala sing katapusan, kag ang mga tawo nga naghimo sing malain banhawon man pero silutan.” —Juan 5:28b, 29

Ang mga tumuluo ni Cristo nga napatay una nga banhawon.



“Kita nga mga buhi pa sa sina nga tion sabniton upod sa ila sa mga panganod sa pag-sugata sa Ginoo sa ibabaw. Kag mangin kapod kita sa Ginoo hasta san-o.”

—1 Tesalonica 4:17

“Magbantay kamo kag mag-andam, kay wala kamo makahibalo kon san-o ako maabot.”

—Marcos 13:33

PAANO MAGBALIK SI JESUS?



“...Magaabot si Jesu-Cristo sa mga panganod. Ang tanan nga mga tawo makakita sa iya....”

–Bugna 1:7

“Kon may magsiling sa inyo, ‘Yari na ang Cristo!’ ukon ‘Didto siya!’ indi kamo magpati. Kon may mga tawo nga magsiling sa inyo, ‘Si Cristo ato sa kami-ngawan,’ indi kamo magkadto didto.”

–Mateo 24:23, 26a

MAGAABOT GILAYON SI JESUS KAG MAKITA SIYA SA MGA PANGANOD

“Kon ako nga Anak sang Tawo magbalik na, makakita ang tanan tungod kay mangin pareho ini sa kilat nga sa diin ang iya kirab makita halin sa sidlangan hasta sa nakatundan. Dayon ako nga Anak sang Tawo makita sa langit nga nagabalik sa kalibutan. Kag ang tanan nga tawo sa kalibutan magahibi kon makita nila ako sa mga panganod nga nagaabot nga may gahom nga nagasilak gid.”

–Mateo 24:27, 30

ANG KANTA PARTE SA MANUGBANTAY SANG KARNERO

(Salmo 23)

Ikaw, GINOO, amo ang akon manugbantay, gani indi ako pagkulangon. Daw pareho ako sa karnero nga ginapapahuway mo sa palahalban nga bugana sang hilamon kag ginatuytuyan sa malinaw nga tubig. Ginapabaskog mo ako. Ginatuytuyan mo ako sa husto nga dalan agod mapadunggan ikaw. Bisan pa nga maglakat ako sa kapatagan nga may katalagman sang kamatayon, indi ako mahadlok, tungod kay kaupod ko ikaw. Ang imo proteksyon kag pagtuytoy sa akon nagapalipay kag nagapabaskog sa akon. Ginapreparahan mo ako sang punsyon samtang nagatulok ang akon mga kaaway. Ginlamhitan mo sing lana ang akon ulo sa pagpadungog sa akon bilang dungganon nga bisita. Kag ginapagustuhan mo ako sang ilimnon. Sigurado gid nga ang imo kaayo kag gugma sa akon magapadayon samtang nagakabuhi ako. Kag magapuyo ako sa imo nga balay, GINOO, hasta san-o.

Cover art, Edwin B. Wallace. Meryl Esenwein inside cover and on pages 10, 12, 14, 16, 27, 29, 39, 41, 42, 44, 46, 47 and 48.

Kon interesado ikaw nga makabaton sang iban pa nga pagtulun-an parte sa Pulong sang Dios, magsulat sa:

World Missionary Press, Inc.
P.O. Box 120
New Paris, IN 46553-0120 USA

Libre ini—indi dapat ibaligya